

Es ecôssous

L'herbâ, â toé d'lai sînt Maîchin, è fayait écoûre lai voigne, c'était dains les années soixante. Lo Tino qu'aivait enne battouse allait de mâjon en mâjon po écoure.

Chu quatre rues ïn traté en fie è dechu ïn gros moteur relayie en lai baitteuse poî enne corroue que f'sait allaie lai machine.

Es heute di maitïn les écôssous se bottïns en l'aipiai. Le Tino beuyait ce tot allait bïn è c'ât lu qu'était és sais. Nôs les gosses, i aivos 15 ans, nôs étïns chu lai tèche po boussaie les dgierbes de biaï où bïn d'avoine devant lai gueule de lai machine. ïn ovrie où bïn le vâlat enflait les djirbes de biaï ou d'avoine dains lai baitteuse que les aivâlait d'ïn côm.

Ah mes aimis, qué poussat tiaind l'avoine était meusie, è fayait des cops bottaie son motchou chu l'meuté, an étieupait tot voi...

Les végïns venïnt baiyie ïn cop d'main, c'ât yo qu'entèchïnt l'étrain â devant l'heu.

Vois les dieche lo paiysain aïppotchait lai gotte è â mede c'était tot les djos di laid ou bïn di pouetcha aivô des fies tchos, ïn cop ou l'âtre di reûti è d'lai purée de pommates tchie lés rétches.

Vois les quaitres nos allïns nonnaie, di freumaidge, di laicé cru è di tia po les gosses.

Lai djornée s'finéçait en lai roue neu pochqu'è fayait encoé remigie l'étrain an lai graïndge. Des sois i rentrôs an l'hôtà voi les dîches où bïn des cops quasi és onze, tot pien de joussâ, noi c'ment ïn raîche tuyé Ah mes aimis, qué corvée.

Lai neû i sondjôs en tos ces raits que païchint an rôtrain les drieres dgierbes â fond di sôlie. I sâtos dains mon yé de pavou, è ritint chu le hât di yé, vegnïns chu lai tâle de neut, me pessint chu l'poi ! Ah ! i en aivos condoigne. Le lend'main è fayait r'ècmencie és heute tchie le Milo qu'aivait des poues dains ses étalattes dos l'solie, po çhur que les raits v'lïnt ritaie de totes les sens. A méd ainco des fies tchos è maïndgie, ainco rentraie és dieches di soi, tot l'herbâ c'était dïnche ! Enne annaie nos finéçhïns d'écoure t'chie Kâlem lai voiye de Nâ, mon Due que l'temps é tçhaïndgie. Po çoli taint meu, po l'rèchte c'ât moins çhur !

Tieuve, lo 13 d'aivri 2020

Lo Pierra tchie lo sâ